



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :

Tir Yimym

tiryimym@aolima

tir yimym

TAPAK 8



China Tir Xi Jinping-i Iran
busemba sangoktsü



Belgian Goalkeeper Arne Espeel
asayaba moapu nung asü

VOL. XX NO. 125 (ADOK 125)

DIMAPUR YANGTEPNÜ (THURSDAY)

TSÜKLAI (FEBRUARY) 16, 2023

₹ 5.00

Mizoram Assembly-i UCC anema bangzüng renem

Aizawl, February 15, 2023

(Agencies): Mizoram assembly-i Mongulbarnü Uniform Civil Code (UCC) anema bangzüng ka renemogo.

Mizoram home minister Lalchamliana-i iba onük benok aser BJP MLA BD Chakma dak alaka MLA 39 prongi mulunga agizük.

India nung UCC yanglutsü atema mapa inyakba mesüra inyaksü aliba kecha magizüker, ta Mizoram sorkari bangzüngtep.

Chief minister Zoramthanga-i anir Mizo National Front (MNF) Legislature party-i January 30 nü UCC anema bangzüng ka renemtsü telemteba agia liasü.

Yashi assembly nung home minister Lalchamliana-i iba onük benokdang "UCC ya yanglura iba ajanga linük nung telesa adoktsü kechiyong UCC ya Mizo nung dena tamangba yimsü nung nübo agi tangar memepertem indang tamangba yimsü aser loktiliba inyaksangshi, sobaliba ozüngtem aser inyakyim agientsüba atema lir" ta ashi.

UCC yanglutsüba ya BJP indang tongti onük lir kechiyong parnok indang election manifesto nung iba ya enoksema liasü, ta

pai ashi.

December 9, 2022 nü BJP MP kati private member bill nung UCC yanglutsü atema benok aser züngsem teimba kati iba ya agizüka liasü, ta Lalchamliana-isa ashi.

UCC ya Parliament nung mashii mapang ka nung yanglutsü akok aser iba ya India ajungalen ozüng kasa benoktsü mesüra nübo agi tangar memepertem indang tamangba, lokti, sobaliba ozüngtem aser inyakyim agientsüba lir, ta paisa metetdaksü.

"UCC ajanga Mizoram nungbo timtem majurutsü akok kechiyong asenok Constitution nung Article 371 G kübok kümzüka lir. Ajisüaka, UCC yanglura ya India atema majung lir" ta Mizoram Home Minister-isa ashi.

Zoramthanga-i aniba MNF ya BJP-i aniba North East Democratic Alliance (NEDA) aser Centre nung BJP-i aniba NDA sorkar den tesentaktep lir.

"MNF-i NDA den sendaktepba lir saka NDA-i party taginüba anema inyakba nung MNF-i meyaritsü" ta chief minister Zoramthanga-i ashi.

BJP manifesto ya nübortem ashioktsütsü atema lir: Congress

Kohima, February 15, 2023

(TYO): Nagaland Assembly elections atema BJP manifesto ajanga Naga nung ashioktsütsü meranger ta All India Congress Committee (AICC) media coordinator Mahima Singh-i ashi.

BJP national president J P Nadda-i Nagaland elections atema tapak 35 aliba manifesto ka sayaogo. Iba nung BJP-i tesüiba küm 5 tsüngda NJP-NDPP sorkar ajanga Nagaland renlokba aser tejakleni aoba indang shian lir saka asangsang nung otsü balaka lir, ta lai ashi.

Nagaland nung lenmang tajung mali, electricity aser tzi shitik mangur aser lanurtem mapa inyadkak mali, ta Mahima-i ashi.

"Nagaland elections atema January hopta tasembuba nung arua amonger. Iba mapang Dimapur aser Kohima nung power supply shitik manguba nguogo, gari lenmang kanga majung aser water supply mali. Ano Wokha adena Mokokchung nung Kohima-i aodang tanga tesemtem tia majungba nguogo" ta Mahima-isa metetdaksü.

MP Jairam Ramesh dena Congress lennir tejentem Brihostibarnü Nagaland-i arutsü aser parnoki Congress candidate tem atema nübo yimtsütsü, ta Mahima-isa shisem.

ajanga tiyazü kulitem agütsü aser Congress-i parnok dak aakmesen melii tiyazü jembiba angatsü yongyar" ta laisa shisem.

"Nagaland nung tetsürtem, tanurtem aser lanurtem nem temeten magütsü tashi Congress-i ola adoktsü. BJP-NDPP lennirtem tashi aginüba ajanga constituency aser yimtsüng tila aika nung timtem agütsür" ta Mahima-isa ashi.

Congress-i Commissioner of Police Dimapur ajanga DGP dangi shidi ka züluogo aser iba nung BJP aser NDPP ajanga ochimashi mapa inyakba onüktem lemsatopogo, ta laisa ashi.

"Naga nungeri küm aika timtema aruogo anungji Nagaland nung alirtem longjemtsü ayongzüker. Ozüng alema inyaksangshiba nung pilaa alitsü aser iba election nung sen o aser tashi amshiba inyakyim agientsü ayongzüker" ta Mahima-isa metetdaksü.

"Nübertemi Nagaland nung küm 20 tashi yimsü süa aruba sorkar atsüngdoktsüla" ta laisa ashi.

MP Jairam Ramesh dena Congress lennir tejentem Brihostibarnü Nagaland-i arutsü aser parnoki Congress candidate tem atema nübo yimtsütsü, ta Mahima-isa shisem.

Nagaland nung tensa junga dang lir: DGP Rupin Sharma



Kohima, February 15, 2023

(TYO): February 27 State elections atema Model Code of Conduct (MCC) tenzüka sülen Nagaland nung law & order tensa junga dang aruogo ta Director General of Police (DGP), Nagaland, Rupin Sharma-i ashi.

"Mokokchung, Wokha aser Longleng district tem nung election dak sendakba mepetmesü kar atalokba dak alaka state ajungalen tensa junga dang aruogo" ta Bodbarnü PHQ nung Rupin Sharma-i osangbener den jembidang

Central armed police force company 75 aruba den Nagaland

police dena patrolling mapa tuluba inyaker, ta pai ashi.

"Police Department-i lendong ataloktsü akok ta bilemba tesemtem nung security akangshiogo aser tangbo tensa junga dang lir. District asem nung election dak sendakba mepetmesü atalokba atema nisung 24 pua lir" ta Rupin-isa ashi.

"Nagaland election atema mapa lemezükja aliba sepaitemi tashiyim meinyaktsüsa tensa junga dang aotsü imlar. Political party tem, candidate tem, pusemertem aser civilian temi ozüng alema inyaksangshi

masütsü mepishir kechiyong nisung taküm samabaji taküm piyong asoshi tarak tamajung alir" ta paisa ayongzüker.

"MCC agütsür arudang Narcotic Drugs and Psychotropic Act kübok ken o 53 benokogo. Taküm election nung voter tem nem yi melena mozü agütsür aser police 6 nungi 8 tashi mozü dak sendakba ken o tem nung tai tonglojka puogo aser parnok nem temerenshi agütsüogo" ta DGP Rupin-isa ashi.

Mongulbar tashi nung state kübok tesem balala nungi sen crore 3.65 puogo. Public-i kulikaket tejangja melii Rs 50,000 tema mabentsüla kechiyong Model code of conduct nung lateta aliba ama aputsü, ta paisa metetdaksü.

Iba osangbener senden nung Additional DGP Sandeep Tamgadge aser RPKikon na dena liasü.

Nagaland nung 'Inclusive education' indang sentong agir

Kohima, February 15, 2023

(TYO): District Inclusive Education Coordinators aser Inclusive Education Resource Persons atema anogo asemnü workshop ka tanü nungi tenzükogo.

Directorate of School Education (DoSE) nung "Improving Learning Outcomes by enabling Inclusive Education" ta ser iba sentong agir.

Iba sentong ya Learning Enhancement Package 2022-23 kübok Nagaland Education Mission Society (NEMS), Samagra Shiksha, Nagaland, Kohima ajanga ayongzüker.

"Sorkar indang policy tem

ajanga integrated education lenmang lapoktsü. Iba dang Inclusive Education ta ajar aser tanur shia nem shisaliok angazükdaktsütsü atema inyaker" ta Nagaland Board of School Education (NBSE) chairperson Asano Sekhose-i ashi.

Rights of Persons with Disabilities (RPWD) Act 2016 ajanga Inclusive Education ya kaketshir ajak (matamabensar dena) külemi shisaliok angazükba lir ta shia lir.

"National Education Policy (NEP) 2020 nung tanur ajak school züngdaktsütsü lateta lir aser iba ya higher education tashi lir. Inclusive Education ya

school education set-up nung enoksemtsüla aser classroom nung tanur ajak angazükdaktsütsüla" ta lai ashi.

Samagra Shiksha Nagaland ajanga tanur ajak asoshi Universal Design for Learning (UDL) shimtetogo, ta Asano Sekhose-isa ashi.

Samagra Shiksha nungi Inclusive Education Resource Persons (IERPs) ajaki iba training nung angazükba ya school tem dangi bener oa tesayurtem dang sayutsü ayongzüker, ta laisa ashi.

Iba sentong nung shisalen sayurtemji Masarrat Khan, Dr. Asunu, Sol's ARC aser Samagra Shiksha IE team nung lir.

Nagaland nung candidate 63% tashi crorepati tem lir

Guwahati, February 15, 2023

(Agencies): Nagaland assembly elections 2023 nung candidate teimba ka crorepatits (millionaires) lir. Taküm candidate tem rongnung parnok 63% tashi crorepatits lir.

Candidate ajak rongnung takartisangji Lok Janshakti Party (Ram Vilas) candidate Dr Sukhato A. Sema lir aser pa indang rongsen Rs 160 crores tema lir.

Iba osang ya The Nagaland Election Watch and Association for Democratic Reforms (ADR) ajanga bushitetba lir. Parnoki candidate 184 indang affidavits repringba sülen iba osang agütsür.

Crorepati candidate ya national party balala nungi parnok 68, state party balala nungi 72, registered unrecognized party tem nungi 25 aser independent candidate 19 lir.

Dr Sukhato A. Sema-i Pughoboto (ST) constituency

nungi tokteper aser pa indang rongsen Rs 160 crores tema lir. Pa sülen Nagaland Chief Minister, Neiphu Rio lir aser pa ket nung Rs 46 crores tema lir.

Rs 1 crore tema rongsen aliba shia aliba nisungtemji BJP candidate 20 nungi 18 (90%), NDPP candidate 40 nungi 34 (85%), NPF candidate 22 nungi 13 (59%) aser JD(U) candidate 7 nungi 4 (57%) lir.

Maneni, Indian National Congress (INC) candidate 23 nungi 6 (26%) ket nung Rs 1 crore tema rongsen aliba shia lir.

Iba ajanga tongtipang political party temi takar candidate tem shimba sayur, ta The Nagaland Election Watch and Association for Democratic Reforms (ADR) report nung shia lir.

Nagaland Assembly Elections 2023 nung rongsen tajemtiba aliba

candidate ji Congress party nungi TNgampai Konyak lir. Pa ket nung rongsen ajak agi Rs 5,251 alang dang lir.

Maneni, candidate tem indang tazüngba kulikakettem repringdangra, candidate 184 rongnungi parnok 49 (27%) ajanga 8th aser 12th standard tsüngda azüngba shia lir aser candidate 128 (70%) ajanga graduated mesüra higher degree azüngba shia lir. Maneni, candidate 4-i parnok diploma holders ta shia lir aser candidate kati 'literate' aser anati 'illiterates' ta affidavit nung lir.

Nagaland assembly election nung tetsürtemi shilem agibaji kanga ajema lir. Taküm elections nung tetsür candidate 4 (2%) dang lir. 2018 Nagaland Assembly Elections nung candidate 193 nungi tetsür candidate 5 (3%) liasü.

"Nai ne temeden Vote magütsüra ajia tamanger asoshi temenensa" Anonymous

- Ungma Baptist Arogo Laishir Telongjem Clean Election Tayongzüka

Nagaland Conservatory of Music-i National Cultural Festival nung shilem agi



Nagaland Conservatory of Music ajanga February 13, 2023 nü Mumbai nung Rashtriya Sanskriti Mahotsav (National Cultural Festival) nung shilem agiba noksa angur.

Dimapur, Tsüklai/February 15 (TYO): Red Fort Lawns nung January ita Republic Day benjongmung mapang takok ngua shilem agiba sülen Nagaland Conservatory of Music ya ano February 13, 2023 nü Mumbai nung Rashtriya Sanskriti Mahotsav (National Cultural Festival) nung shilem agitsü jaoka liasü.

Nagaland Conservatory of Music ya Hito Kiho-i anir lir, shiba Nagaland Conservatory of Music nung Conducting faculty ama inyaker.

Choir nungya Nagaland Conservatory of Music nung azünger kaketshir 20 lir aser

parnok ya under graduate music degree program nung shilem ka ama training agir.

Nagaland Conservatory of Music ya 2012 küm Dimapur nung Lipokmar Tzudir-i kaketshirtem kentener, scholar, tesayurtem ama renemdaktsütsü aser nüburttem nem performance, scholarship aser education agütsütsü nükjidong nung amenoka liasü.

Küm ter tsüingta Nagaland Conservatory of Music yagi international jenjang nung specialized music education aser professional training agüja arur aser kaketshir dak kententsü sempet yangertsür, shisa agütsür,

angatetdaktsür aser ibaj ajanga linük aser international sapang nung kentenba tsütsü shilem tulu agia arur.

Nagaland Conservatory of Music yagi Nagaland aser India tenüng nung Norway, Belgium, Italy, Spain aser Ireland nung ICCR aser Indian Missions den lungjemer shilem agia aruogo aser linük nunga shilem tajung agia arur.

Kentenba tsütsü pei sempet tajungba kumdaktsütsü mechi linük telungzük nung alirtem den Philippines, Korea aser France nunga arua Nagaland Conservatory of Music nung azünger.

LPJ candidate Kitoho S Rotokha nübuyim Old Showuba nung agi



Dimapur, Tsüklai/February 15 (TYO): 5 Ghaspani II LPJ candidate Kitoho S Rotokha nübuyim sentong Old Showuba ground nung

Bodhbarnü agia liasü.

Iba sentong nung jembidang, constituency nung healthcare, education aser lenmang amala tongtipang nungdak tem peria melira nübur maintsü, ta Rotokha-i ashi.

Pai nüburttem dang tiazü politics nem memesü zükdaktsütsü saka terenlok bener arutsütetba lenir shimtsü ayongzuka liasü.

Pai nüburttem dang vote mayoktsü ayongzük, kechiaser asenek ya yoka achiba oset ka masü, ta ashi.

Opposition candidate temi ni luja jembiba ama ni tali tashi taitba akumer. Takok nguang-tongu, ni iba tesem asoshi alitsü, ta pai ashi.

Pai nüburttem dang sarasadema February 27 nü pei vote agüja nübur asoshi inyakba lenir shimtsü ayongzuka liasü.

Medical ground nung ketdangsür election duty magütsür

Dimapur, Tsüklai/February 15 (TYO): Deputy Commissioner and District Election Officer Mokokchung, Shashank Pratap Singh IAS ajanga sangdong ka nung ashiba agi, Medical Board ajanga February 13, 2023 nü

ADC Planning Hall, Mokokchung nung asadanger Annexure-A nung agüja aliba applicant tem medical ground nung ajemdaker election duty magütsür.

Tanüngba personnel shirnoksa Medical Board

ajanga recommendation agüja mali, parnok ajak election duty inyaktü asoshi training ajak nung adentsüla, ta sangdong ajanga ashi.

Training nung madenertem election ozüing agi melaba ama tapet temerenshi alitsü, ta ashi.



Mokokchung, Tsüklai/February 13(TYO) : February 15 nü Alempang Baptist Arogo, Alempang Ward Yimden, Alempang Watsü Telok aser Alempang Youth Association telok aseme ayongzuka Grace garden Alempang Ward nung 24th Angetyongpang A/C nungi 14th Nagaland Legislative Asembly election nung tokteptsüpar par asem NDPP candidate Tongpang Ozükum, Independent candidate Er.K.Wati aser NPP candidate Maongkaba Ozükum jaoka par asem election nung toktepba sangdongdakja par asem election-i aiba nükjidong lemsateptsü mapang lapokja liasü aser iba sentong temer kelen par asem den sentong ayongertem külemi tangokba noksa nung angur.

School tem dang tekumdangtsü metetdaktsür

Dimapur, Tsüklai/February 15 (TYO): Department of School Education ajanga sangdong ka nung ashiba agi, email ID contact@skillkicclass.com amer tentet kati school tem ashiokja Skill Development Courses tem PMO Compliance tenüng nung subsidized rates/MSPs nung agütsür.

Iba tentet yagu India nung aliba school ajanga dak tenük yoker.

Iba dak sendakba nung Ministry of Education, Government of India mesüra Department of School

Education, Nagaland ajanga iba ama totuyuba kecha agüja mali, ta Department sangdong ajanga ashi.

Anungji Nagaland state kübok aliba school (Government/Private) ajak indang Heads tem dang iba amala ashikülak sang nung mashitsü tekumdangtsü metetdaktsü.

Maneni school kari danga iba amala emails arura aser senotsü agütsür lira, tekeratiba nung School Education Directorate nem osang agütsütsü metetdaktsür, ta sangdong ajanga ashi.

Mokokchung district nung election nübuyim atema temelaba agitsüla

Dimapur, Tsüklai/February 15 (TYO): Nagaland Legislative Assembly 2023 atema 14 buba General Election asoshi candidate temi political rally/meetings/ procession alitsü aser gari/ loudspeaker amshitsü atema jelia temelaba magi inyaker ta office dangi osang arua lir, ta Deputy Commissioner & District Election Officer Mokokchung, Shashank Pratap Singh IAS ajanga sangdong ka nung ashi.

Anungji election tajungtiba nung takok ngua aser sunepa agitetsü mechi candidate aser

political party ajaki DEO/RO nungi vehicles campaign, rallies, processions aser meeting atema temelaba meshitsüla, ta nenshia metetdaktsü.

Tim ketdangsür nungi temelaba makai election office/camp amala kecha mamenoktsü.

Jelia temelaba magie mesüra osang tai/tiazü agütsür election dak sendakba maparen kar danga inyakba metetra itemji model code of conduct nung aibelener asüsü aser tapet ozüing agi merenshitsü, ta sangdong ajangasa ashi.

Mokokchung Police-i yi apu



Mokokchung, 15th Feb (TYO): Ozüngi memelaba temesepba yi shibelenba osang tejangja kar lazüka, 13th Feb nü nikongdang 4:30 meta Chuchuyimlang o Mongsenyimti yim tsüingta Mokokchung police-i gari 6 nung yi Mc Rum

case 153 apu, ta police osang ka ajanga metetdaktsü.

Iba keno dak sentakba nung nisung 6 (six) pua lir aser Mokokchung PS-I nung case registered sür bushisüngdang maparen tenzükogo, ta osang ajangasa metetdaktsü.

DC Mkg ajanga Presiding officer aser Polling officer training ayonger

Dimapur, Tsüklai/February 15 (TYO): Deputy Commissioner aser District Election Officer, Mokokchung, Shashank Pratap Singh IAS ajanga Presiding Officers (Tebur aser Tetsür) ajak dang tasembuba training February 17, 2023 nü Mayangnokcha Govt. Higher Secondary School (MGHSS), Mokokchung nung anepdang 10:00 ako nungi nikongdang 3:00 ako tashi agitsü, ta metetdaktsü.

Polling Officer-2 (Tebur & Tetsür) aser Polling Officer-3

(Tetsür & Tebur) atema training February 18, 2023 anepdang 10:00 ako nungi nikongdang 1:00 ako tashi MGHSS nung alitsü, ta ashi.

Polling personnel shirnokisa tang tashi parnok indang colored passport (ana) magütsü ali, parnok passport tesülen pei tenüng aser duty list nung aliba serial number jangjaa zülur training agiba anogo nung bener arotsüla, ta ashi. Nisung ajak anepdang 9:30 ako tashi nungbo tesentepdang tonger alitsüla, ta sangdong ajangasa ashi.



February 15, 2023 nü Jantar Mantar, New Delhi nung Reformist, Sonam Wangchuk leniba nung Ladakh nungi lenirtemi Ladakh nem state jenjang agüjang aser Kargil o Leh na nem temeja parliamentary constituencies agüjang, ta takhangba agüja longkak aitba noksa nung angur.

LAC-i yoktsü atema ITBP Battalion 7 tentettsü Cabinet-i agizükogo

New Delhi, Tsüklai/February 15 (Agencies): Bodhbarnü Union Cabinet-i India-China arrtsülen LAC anüksü asoshi Indo-Tibetan Border Police (ITBP) Battalion 7 tentettsü atema agizükogo, ta sorkari metetdaksü.

Ato kilonser, Narendra Modi leniba nung Union Cabinet senden amenba mapang iba temepishibaji agizüka liasü.

Cabinet Committee on Security (CCS) senden tembangba sülen osangbenertem den jembidang Union Minister for Information & Broadcasting (I&B), Anurag Thakur-i, ITBP battalion tasen tenet tentettsü atema sorkari agizükogo, ta metetdaksü.

Battalion tasen tenet aser

sector headquarters ji 2025 küm tashi nungbo renemtsü aser iba nungji sen crore 1,800 dak tema indoktsü, ta Minister-i metetdaksü.

Osang angazükba agi, sepaitem jagi border posts tasen 47 den 'staging camps' mesüra troops bases 12 anüksü. 2020 küm nungi tenzüka Ladakh nung India aser China sepaitem tsüngda mapang shia rara adoka tensa raksar.

1962 küm China-i ambangyima inyakba ajanga linük ana tsüngda rara adokba sülen nungi tenzüka India nung ITBP sepai 90,000 anitet aser India anüdoklen Ladakh kübok Karakoram Pass nungi Arunachal Pradesh kübok Jachep La tashi nung kilometer

3,488 Line of Actual Control (LAC) anüksü atema sepaitemji lemsükja liasü.

Mapang shia India External Affairs Minister, S Jaishankar-i LAC nung tensa raksaba osang metetdakja arur.

Anüdoklen Ladakh nung tanüngba mangatettep ken otem bentettsü atema yaküm December 20 nü India aser China naprongla nungi sepai tongti ketdangsertem senden mena liasü.

"December 20 nü 17buba India-China Corps Commander level senden China tsütsülen Chushul-Moldo border meeting point nung ayongzüka mena liasü," ta Ministry of External Affairs otongdar, Arindam Bagchi-i sangdong ka ajanga metetdaksü.

Supreme Court-i Adani-Hindenburg ken o angadangtsü melunger

New Delhi, February 15 (Agencies): Bodhbarnü Supreme Court-i Congress lenir kati Adani-Hindenburg ken o bushisüngdangtsü mepishiba ken o February 17 nü angadangtsü melungogo.

Congress lenir kati, US nung amenoka aliba Hindenburg Research-i Adani Group nem ochimashi tai tongloktsübaji Supreme Court judge ka ketdangsuba kübok bushisüngdangtsü atema SC nem temepishiba ken o ka agüja liasü.

Chief Justice D Y Chandrachud aser Justice P S Narasimha nati akümba bench-i lawyer ka ajanga Congress lenir, Jaya Thakur-i benokba ken

o angadangtsü melungogo.

Mezüngbo bench-i iba ken oji February 24 nü angadangtsü lemteta liasü saka lawyer-i February 17 nüa temepishiba ken o ana angadangtsü lir, ta ashiba nung ajemdaker iba ken oji-a February 17 nü angadangtsü lemtet.

Thakur-i Life Insurance Corporation of India (LIC) aser State Bank of India (SBI) natia public sen aika Adani Enterprises nung invest süa aliba nung ajemdaker LIC aser SBI-i inyakba shilem-a bushisüngdangtsü mepishia lir.

Tawa Hindenburg Research-i ochimashi tai tongloktsüba ajanga Adani Group shares jenjang mejungi

akümba sülen stock market tashi aittsü atema mongintemi committee ka tentettsü asoshi Supreme Court-i benokba sülen Centre sorkari committee ji tentettsü melungogo.

Adani group stocks jenjang mejungi akümba ajanga Life Insurance Corporation (LIC) aser public sector banks indang investments jenjang mejungi akümtsüsa lir.

LIC-i Adani group stocks nung sen aika invest süa lir. Hindenburg Research indang report ka ajanga Adani group company stocks nung ochimashi lir, ta tai tongloktsüba sülen Adani Group dollar sen billion 100 dak tema takoksa nguogo.



Mumbai, February 15, 2023: Bodhbarnü Mumbai nung Thailand nungi Buddhist putirtem aser züngsemtemi Lord Buddha tasü mang arongba mitsü bener yimdong süa jajaba noksa nung angur.

I-T-i maneni Delhi aser Mumbai na nung BBC office mita odar **New Delhi, February 15 (Agencies):** Income Tax department-i Bodhbarnü Delhi aser Mumbai na nung BBC office tem mita ogo aser maneni mita odar.

Osang angazükba agi, I-T ketdangsertemi BBC indang electronic & paper-based financial data ajak agizükogo.

BBC-i parnok establishment nung inyakertem dang pei kidang nungi dang mapa inyaka liang aser nija income dak sendakba nung telangzüba kecha tagütsü, ta tuyuogo. Itasen dak sendakba tasüngdangbatembo langzüang saka pei nija income indang kecha teshi, ta parnok dang tuyu. Ajisüaka I-T ketdangsertem den akokba tashi amalitepa inyakang aser tasüngdangbatem jungjunga langzüang ta tuyu.

Delhi aser Mumbai naprongla nung Mongolbarnü anüngdang 11:00 ako nungi I-T nungi ketdangsertem BBC office tem mita ao. Police-i New Delhi nung aliba BBC office shibang aser BBC office nung inyaker staff kar indang mobile phones aser laptops puogo.

Mongolbarnü Information & Broadcasting Minister, Anurag Thakur-i, nisung shinga ozüng dang nungi temaba masü, ta ashiba den külemi BBC office

tem mita aoba osangji Income Tax department-i lemsateptsü, ta metetdakja liasü.

Tawa BBC-i 2002 küm Ato kilonser, Narendra Modi Gujarat nung chief minister inyakba mapang Gujarat nung rara tulu adokba dak sendakba documentary ka sayaba sülen linük nung mangatettep tulu adoka liasü.

Tang I-T ketdangsertemi BBC office tem mita aoba tenzüka sülen journalist tentettem aser opposition party temi, iba ya democracy anema inyakba lir, ta aitsüdar.

Congress lenir, Pawan Khera-i, "Talisa iba ya India atema tenüng menük lir, kechiyong asenoki G-20 Summit ayongzüker aser Modi sorkari iba (G-20) ya kanga yongyar," ta ashi.

PDP Tir, Mehbooba Muftia, I-T-i BBC anema inyakba ajanga alima dang osang tai sangoktsür aser India nunger democracy tenüng menüksür, ta aitsü. Yimtenren party aikati, IT Department-i BBC office tem mita aoba ya Modi sorkari BBC anema mangyangba lir, ta aitsüdar.

Mongolbarnü US-i, Indian tax ketdangsertemi Delhi nung BBC office mita aoba osangji onoki metetogo saka iba dak sendakba nung onoki oshidang agütsütsüsa masü, ta shiogo.



February 15, 2023 nü Rashtrapati Bhavan, New Delhi nung Nagaland, Rajasthan aser Uttarakhand nung aliba school tem nungi kaketshirtemi linük Tir, Droupadi Murmu ajurudang tangokba noksa nung angur.

NIA-i Kerala, Karnataka, Tamil Nadu nung IS pusemertem mita ao

New Delhi, February 15 (Agencies): Bodhbar anepdang nungi National Investigation Agency (NIA)-i Kerala, Karnataka aser Tamil Nadu nung ISIS pusemertem mita ao tenzükgogo, ta osang ka ajanga metetdaksü.

Yaküm Tamil Nadu kübok Coimbatore aser Karnataka kübok Mangaluru nung bomb lendong balala atalokba dak sendakba nung NIA-i item state nung tesem aika mita ao tenzükgogo.

State asem nungji mapang ka nung dang tesem 60 shi mita ao, aser item rongnung Tamil Nadu kübok Kodungaiyur aser Kerala kübok Mannadi densema lir.

Yaküm October 23 nü Coimbatore district kübok Kottai Eswaran tekülem ki kima gari ka nung bomb apokba sülen October 27 nungi tenzüka NIA-i bushisüngdang tenzüka liasü.

Iba tatalokba dak sendakba nung tai tonglokja alir nisung 11 pua lir.

ISIS den tezüngzüktep agir, Jamesha Mubeen iba lendong nung taküm bendanga agütsü; pai Hindu nunger tekülem kiji ajak raksatsütsü nükjidong nung taküm bendanga agüja bomb pokdaksü.

Yaküm November 19 nü Mangaluru nung passenger, Mohammed Shariq-i Improvised Explosive Device (IED) agi yangluba pressure cooker bomb pokdaksüba sülen NIA-i December ita nungi iba tatalokba bushisüngdang tenzüka liasü.

Item tatalokba sülen NIA-i Unlawful Activities (Prevention) Act kübok bushisüngdang tenzüka liasü aser tongti tai tonglokja alir Shariq dang asüngdangyaba ajanga pa Islamic State (IS) den tesendaktep aliba jangjaogo.



TIR YIMYIM YIMOBILEM (EDITORIAL)

DIMAPUR RASEMNÜ, TSÜKLAI (FEBRUARY) 15, 2022

Sarasademer tenzüker aser tembanger

Election mapang ya vote yokang teyok mesüra vote aliang tali, mesüra tashiyim amshiang tamshi senden sentong ajak sarasademer tenzüker aser sarasademer atemer. Tetezü, asenok ya Khristanbo Khristan aser Tsüngrembo tsübur ta sayur. Asenok majungyonga aser peisasa pei mazüoktetyonga Tsüngrem dang tashi aser takok meshia sarasademtsü mamaba nungji asenok dak topur ajung ka sayur. Ashiko, iba jagi Tsüngrema pelaa alitsüa akok. Ajisüaka, shisabulutsü kaji, asenoki sarasadembaji masü saka asenoki sarasademer kechi inyaker ta asübaji lir. Atangji, tang asenoki election nung inyakba mapatem yabo sarasademer inyaksüla mapatembo masü. Sarasademer kodaser vote alilen jajatsü ? Kodaser sarasademer lanurtem nem yi aser drugs chidaktsür raratepdaktsütsü ? Kodaser sarasademer nisung tamajunger bushia prangpong injang aser bomb amuoktsütsü ? Kodaser sarasademer kimunglumung yoker-ang sentem tulu agi sen apua vote alia election nung adoktsü merangtsü ? Kodaser sarasademer asen kija khen, kibong ajunga khen aser ano telok tentetter khen ta aseben pezüben candidate dang asen vote ayoktsü ? Asen vote ayokbaji asen ayoker. Asenokbo Tsüngrem dang ni aser ozü kibong vote ya sen kwi agi shiba dang yokla (?) ta asüngdanga sarasademer asü ? Mesüra asenokbo par yimtak aser par kiyong nung sen kwi endokla ta sarasademer ? Asenok taküm aser loktiliba ya bilemdangra, shingaia asenok kangshia Khristan mekümdaktsü aser tanüa Khristan masü tanga tamangba yimsü amangnura shingaia menokdang. Asen lima aser asen loktiliba nung tajung kaji aji lir. Ajisüaka, asenok dak majung kaji, Khristanbo süner saka tamakok aser sensak maremer, iba jagi tenüngbo Khristan saka Khristan anemba telok nungi temoatsü agitsü merangteper. Yisu Khrista dak amangba nung asen nungdak ajak ataloktsütsü tenangzükba lir saka ano Yisu Khrista sülen anidaker Khristan taküm ka akümstsü atema mezüng ochi nung aliba ajanga ajuruba timtem, maksü aser tamakok aremstsüla. Ajisüaka, tanü asenok election sentong ajak sarasademer tenzüker aser sarasademer atemer Khristan-bo süner saka ochimashi agi takok angutsü meranger. Asenok asoshi lendongji yangji keta lir. Aji oda, asenoki Tsüngrem dang "nü mulung sang" ta ser sarasadem atemer asünungji, Pai asen akaba ajak laludaktsür meshimetsür kümdaktsü nungbo koda ? Pai asen akaba dak tali endokdaksür shisabolu agi arishi tatsüba kümdaktsü nungbo koda ? Kasaji, aseni vote ayokba senji asen atema tashidak aser chirnurtem atema atakarterm aküm nungbo koda ? Election nung pei vote ayokba agi jangratema takar küma aliba nisung kar dang ajurura asüngdang ? Sarasademba tetezü Tsüngrem majangi kecha meinyakner, anungji Tsüngrem dang nungi temelaba meshir. Ibaji asenoki angateta inyakra, atangji, sarasadem ajanga tashi tasen aser temulung lemtet tulu Tsüngrem nungi angutsü. Tsüngrem dangbo asüngdang saka Pai memelaba mapatemang inyak ta asüba dang nungi tamasayongi masü dang tangjungba. Tetezü sarasademer ochimashi aser tashiyim mapa inyaksü agibo sarasadem masü ser inyakang tangjungba. Election mapang nisung aika yi jemteper tebur kümteper, ajisüaka shitakba alima tongpangbo parnoki makoker, iba jagi election mapang teburchitem election temerbo lapi kümer tangar kiküma majangtet alir. Ano election mapang shiner aser mangdang angur aika adoker aser parnoki adoktsü madoktsü shiner. Item shinertem jagi candidate aika anak auyi kümstsüogo. Iba tashiji asenok Khristan-temi benshir. Khristan asütsüba ya temela masü, tasak, anungji election mapang nung dang masü tanga mapang nunga asenoki Khristan memesük alir, ibayongji tangar yimsü amangertemi asenok akhüm metsübur. Ashi, asenoki sentong ajak sarasademer tenzüker aser sarasademer atemer ta asüba ama, teti asen mapa ajak nung Tsüngremi mulunglen anidak asübo, asenokang tangar tamangba yimsü aniba telok (party) nung masü tangarjiang asenoki aniba telok (party) nung denla.

OLEMSABANG

TSÜGREMER SAYATENYA TEKÜMZÜKBA

-Rev. Ayu Pastor, Dibuia



Dibuia nunger ajonga samar alitsüba Tsüngremi Pa sayatenya agi February 15, 1957 küm kümzükba otsü tatsüka yangi lemsateper.

1951-1958 mapang ya, Naga nunger nüjiso atema rara tenzüka aodang India sepaitemi rishikangshibayong asen nübor nüktzü ayimba mapang ka liasü. Naga limai kodang Indian sepai aru, iba mapang 8th Gorkha Regiment nung Major Saran Shingh tanishiba liasü. Pai Locha aser Sema lima nübortem kanga dang mejungi rishikangshia aru. Kodang pai aniba telok Ao lima tonga aru, Longpha yimtak tesem ka nung yimer ajak adenshia yur lokti nungi tapi agi nisung 5 jateter ajaki repranga lia kaset. Iba nisung tamajungi aniba telok Wromung Sepai Camp tonga aru. Pai rishikangshiba aser timtem jenti agütsüba atema Naga Army-i pa dak tenük yok. Yamaji künü anogobo pa meneptsü ta arishia alidang Dibuia lushi "Lamen Yinten" ta ajaba amung arr mena ata aser 1957 February 11 anogo pa kaset. Iba ya Indian Sepai asoshi tamakok aser maksü tulu liasü.

Anungji Major Saran Singh kasetba ya Dibuia nungeri ashioktsü ama sepaitemi bilem nungji tayang küpzüktsü asoshi Dibuia nunger samatsütsü sepaitemi sentong yanglu. Yamaji Saran Singh sür anogo pezünübuba nung mang ayangtsü asoshi Indian Army-temi Dibuia yim meketbang aser bomb terana (12) yimtak tongtibang tesem ajaklen ajongoktsü. Saka nisung ka danga meyiru aser masü. Ibai anepdang yimertem ajak pei pei aki-alui aotsü renemtepba mapang, chiyongba mapang, ajak kidang aliba mapang liasü.

Iba mapang kibong tasen akümer ka Mrs. & Mr. Akangningsang Pongen, apuani atep nung mener chiyonga alidang par ki tezülen bomb ka apok. Iba apokba jagi Akangba chiyonga aliba ausoji pokdok saka tenabo kecha meyiru kümzük. Tesü reprangdang nung an chanu ka dang pokseta liasü.

Bomb pokzükli dang Assam Rifle Camp nungi aritepa nisung ajak sür alitsü ta Dibuia ait. Iba mapang yimertem taoksa nung pakzütepa alidang sepaitemi 'nisung kwi asü?' ta asüngdang nung, "Shinga teyiruba aser tasüba mali." ta langzü, idangji Assam Rifle-tema kanga süngmangtep. Idangji sepaitemi Dibuia nunger dang, "Nenoki amangba Tsüngremi nenok kümzükogo." ta shir parnok camp bushia Waromung-i tugu.

Ibai Tsüngremi Daniel Molusongzü kangla nungi kümzükba ama liasü.

Ibai Tsüngremi Shadrak Meshak aser Abednego nunger mi kangla nungi kümzükba ama liasü.

Kechiyong parnok dak Tsüngrem anema inyakba tai kecha mali, ochishirtem liasü.

Tsüngremi Dibuia nunger Bomb lendong nungi kümzükba taküm 2023 küm 66 ajunger. Küm shia iba anogo TULUSANG TSÜNGREMi kümzükba asoshi Dibuia nungeri tenüngsang agütsüba sarasadem agia amunger. Pai kümzükba asoshi maneni Tsüngrem tenüng asanger.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

MP nung Tenla ki telung rongdoktsüba Arogo lenirtemi aitsür



Madhya Pradesh kübok Narmadapuram district nung Evangelical Lutheran Arogo Tenla ki telung rongdoktsür aliba noksa nung angur.

February 14, 2023: Madhya Pradesh state nung Protestant Arogo Tenla ki ka telung rongdoktsüba sülen India nung Khristan lenirtem aikati iba tatalokba aitsüogo.

Madhya Pradesh kübok Narmadapuram district nung Evangelical Lutheran Arogo Tenla ki telung rongdoktsübaji February 12, 2023 nü ang meteta liasü.

"Tenla ki telungji kodang rongdoktsürar onoki memetet," ta Arogo nung pastor, Mahesh Kumre-i metetdaksü.

February 13 nü osangbener den jembidang pastor-i, "Onok tesüsa iba Tenla kidang February 5 nü sarasadem sentong agia liasü aser February 12 nü tekülem sentong agitsü atema Tenla kidangi aodangbo Tenla ki telung rongdoktsür liasü," ta metetdaksü.

Iba Tenla ki ya küm 6 tejaklen yanglu aser Tenla kidang nisung 1,000 tashi menteter.

Aibelenertem jagi kichiba nung aliba insang raksar Tenla ki telungi tua Laishibatem, sarasadem leniba kaketter, menden, bangka aser Tenla bendenba box ajak rongdoktsü, ta pai ashi.

Tenla ki telung nung 'Yisu' ta zülua alidak Hindu nunger tsüngrem 'Rama' Hindi oshi agi

zülur liasü. Iba Tenla ki ya Narmadapuram district nung lir. "Onoki police matsügang ken o ka benokogo aser iba tatalokba bushisügangdangtsü atema mepishio," ta Pastor Kumre-i metetdaksü.

Madhya Pradesh nung Catholic Arogo public relations officer, Maria Stephan-i, "Tenla ki rongdoktsüba ya kechi kuli agi südir süaka terenlok aliba loktiliba ka nung tamangba yimsü ka indang tekülem ki rongdoktsüba mesüra raksatsübaji ajanga kecha mebenetetsü saka tsükchitep dang adokdaksütsü," ta ashi.

"Iba tatalokba ya, tamangba yimsü meyipdaksür ta tai tonglokja onok (Catholi Arogo) anema inyakba mapatong rongnung shilem ka asütsü amai reprangteter," ta February 13 nü Stephan-i osangbener dang ashi.

Nütsüng million 72 aliba state Madhya Pradesh nung Khristan nütsüngbo shilem 1 dang nungi tajemba lir (shilem 0.29 dang lir).

India nung state 11 nung anti conversion ozüngtem benoka lir, aser item state rongnung Madhya Pradesh-a densema lir. Iba ozüng kübok Khristan mesüra Islam yimsü dangi meyiptem küm 10 tashi tepuokdak ayutsü aser senchi-

a achitsü. Iba ozüng ya 2021 küm state assembly nung agizüka liasü.

Kasa ozüng kübok Khristan aser Muslim nungertem Hindu yimsü amanger tetsürtem den kibong akümtsü makok.

Ajisüaka iba ozüng kübok Khristan mesüra Islam yimsü amangertemibo Hindu yimsü dangi meyiptsü melar, koba dang kidangi tanaben meyipba (Ghar Vapasi) ta ajar.

Khristan putir, Stephan-i, "Onoki tangartem tamangba yimsü meyipdaksür, ta onok nem tai tongloktsür, ajisüaka atangji nungbo, pei sasa melungteta Khristan yimsü agizüknertembo onoki menokdang," ta metetdaksü.

"Yimsü meyipba dak sendakba nungi mangatettep madoktsü atema onoki sorkar nem yimsü balala nungi lenirtem züngsema coordination committee ka tentetdaksüner," ta pai ashi.

United Christian Forum (UCF)-i ashiba agi, yaküm November ita tashi nung Madhya Pradesh nung Khristantem aser Khristan rejutem anema inyakba tatalokba 22 liasü aser 2021 küm nunga state nung Khristantem anema inyakba tatalokba 39 liasü.

Anojungi kiyimba anema inyakba Arogo lenirtemia pusemer

February 15, 2023: India nung anojungi tanur million aika kibong kümdaktsüba osang international agency temi sangdongba mapang tang Assam state nung anojungi kiyimba anema inyakba mapatong ya Khristan lenirtemia pusemer.

February 3 nungi Assam nung police-i anojungi kiyimertem mita aoba mapang kiyimba ketdangsüa agir Hindu aser Muslim nunger putirtem densema nisung 3,000 dak tema puogo.

February 14 nü osangbener den jembidang Assam kübok Dibugarh nung tongti putir, Albert Hemrom-i, "Anojungi tanur kibong kümdaktsüba tebilemtsü anema sorkari mera

agia inyakbaji onokia (Khristantem) pelaa agizüker," ta metetdaksü.

Khristan putir, Hemrom-isa, tang pua alirtemji tain kümer süaka arrshi küm 5-6 asügang kibong akümertemji junga anepalutsüla, ta ashi.

Paisa, tang pua alirtemji jail nung masemtsü, aser ibaji ajanga talisa tetsürtem timtemtsü, ta ashi.

Anojungi kibong kümdaktsüba ya loktiliba temenen ka lir, aser Arogoia item tebilemtsü anema rarar, ta pai ashi.

"Onoki Arogo nung awareness program ka tenzükgogo. Asenoki iba menen anema longjemer raratsüla," ta paisa ayongzüik.

Tang alima nung anojungi kibong kümer alir tetsür million 650 shi lir, aser iba nungjagi shilem 33 shibo India nung lir.

India nung anojungi kibong akümer tetsür million 223 lir aser iba nungjagi million 102 bo arrshi küm 15 majungba kibong akümertem lir, ta UNICEF report ka ajanga metetdaksü.

State sorkari, arrshi küm 14 majung tetsür den kibong akümertem Protection of Children from Sexual Offences (POCSO) Act ozüng kübok aputsü, ta sangdonga liasü.

2017 küm Supreme Court-ia, anojungi arrshi küm nung tanur kinüngtsü ka den shi nung medembaji tashiyim amshia raksatsüba den kasa, ta obendang agüja liasü.

ANOGO ABEN TSÜNGREM DEN

Taochi Temeim

"Aser Kibubai kü dang ashi, Ano oang, züngatsür ka shiba la tembari meimer aser nüktapangtatsür ka lir, la meimang; oda Israel Chirtemi tangar Tsüngrem dangi meyipaka aser kismis amtsük meimaka, Kibubai parnok dang meim ama, nai la meimang" - Hosea 3:1.

Tsüngremi pa chirtem meimba meimchiri mangajemer. Tsüngremi kecha telatet makai meimba temeim asenok meimchir telatet temeim agi tsükdanger. Asenoki Hosea taküm nungi iba temeim noksa angutsü akok.

Hosea temeshi nisung ka liasü, saka Tsüngremi temenentsür ka den satitsü ashi. Hosea tashi anga, Gomer pa kinüngtsü asütsü agi. Pai la peladaksü aser akhüm tsübua tushia amshi. Gomeri iba ama temeim ngua maru, saka lai yakta temulung mesüi aküm. Lai la temeim tangar ka nem agütsütsü tenzü. La tenük tasen adokba tangar tebur meim. La nüktapangtatsür ka aküm aser yakta Hosea toktsü. Tangari la kecha maka tashi amshir toktsü. Aser tangari la alar ama ayok. Iba sülen Tsüngremi Hosea nem tesüngmangtsü ozüng ka agütsü: "Oang aser la tanaben alizükang." Gomeri pa agütsüba toktsür Gomer dang tai atoktsü aser jenjang agütsür la tanaben anir arutsü Tsüngremi Hosea dang ashi.

Tsüngremer osangji tejangja. Kodang asenoki Pa sentoker aser tangar lenmangi meyiper, nüktapangtatsüri yirutsüba ama asenoki Pa yirutsür. Asenok mejungia Tsüngremi asenok asoshi inyak, asenoki sentoktsübaji tangatetsü tasak. Asenoki Pa sentokaka aser tashi mangaka Tsüngrem temeim sentokba angatetsü tasakba lir. Pa temeimi asenok temenen punglang tashi lua tanaben anir maru tashi bushir. Tsüngrem temeim asenok temeim dang nungi balaka. Kodang asenoki Pa nungi jena odir, Pai maneni asenok anishir. Kechi koma masadangtetba temeim Pai asenok dang sayur !

Asbury University nung tanela asentenshi milak tulu adok

February 15, 2023: February 8, 2023 nü Christian college campus, Kentucky nung aliba Asbury University nung revival milak tulu jangruba sülen ghonda 50 maneni revival sentong agidang nisung aika temoatsü nguogo.

February 8 anepdang Khristan college campus nung aliba Hughes Auditorium nung anepdang tekülem sentong agia liasü saka tekülem sentong tembangba sülen kaketshir ishika maneni tekülem sentong agidang ano nisung kar arusema aden. Iba mapang nungji revival milak tulu jangru tenzüka liasü.

Iba university nung campus newspaper 'The Collegian' nung yimobilem zülur, Alexandra Presta-i iba revival nung ajangshibatem lemsatetp.

Osangbener den jembidang Presta-i, Bodhbarnü chapel tekülem sentong tembangba sülen kaketshir 30-ibo maneni sarasadema liasü; iba chapel tekülem sentong nung o jembir, Zach Meerkreets-i Rome tapu 12 nung ajemdaker "mapa agi temeim sayuba" onük jembia liasü, ta metetdaksü.

"Ni minute ishika atema tekülem toktsür ao saka meyipa aotsü ni ajungshia liasü. Iba

mapang nungjagi tenzüka tekülem sentong manenteti liasü. Tenüngsang ken atenba den külemi taküm kuli lemsatetpba, sarasadem aser tatok meshiba sarasadem manenteti liasü. Atangji onoki Tanela Temeshi ajangshia liasü," ta lai metetdaksü.

Presta-i ashiba agi, ghonda 50 shi maneni tekülem sentong agidang nisung 1000 shi aden; karbo tom nung ao saka aika yangji dang mejang aser tenüngsang agütsüba manenteti liasü.

1970 küm nunga Febraury ita nungsa Asbury University campus nung revival tulu aoka liasü. 1970 küm revival milak prokshiba ajanga Fort Worth, Texas nung aliba Southwestern Baptist Theological Seminary-a kongshia liasü.

Tasüngdangba ka langzüdang Presta-i, "Taoba mapang revival aser tang atalokba revival na medemdangtsüji tim masü. Iba ya atangji Tanela Temeshi mapa liasü. Onoki temeim, tesünep aser taneptsüba ajangshi. Nisung aika taküm melenshiogo, anungji revival anaji medemdangtsü agibo iba atemaji dang tenüngsang agütsütsüla," ta ashi.

AO OSHI ANGAZÜKDAK: TANÜ ANGAZÜKTSÜBA OJANG



Otia

(v) memiimshi inyakba (openly)

* Nisung karibo nübertem meyong otia auyar.

Otisem

(n) Oti ojang agi koma inyakar ashiba ojang (adverb)

* Mapa junga inyak asü meinyakar otisem ojang agi ashir.

OLONG PAITEP # 6430

Grid for crossword puzzle #6430 with numbers 1-17 indicating starting positions.

TIPLÉN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S_ _ _ i - (3)
9. Nisung rongnung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong talebangliba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Kenyongi majninü - (5)
13. Rong kanga tulu - (5)

OLONG PAITEP # 6429 TELANGZÜBA

TIPLÉN :

- 1. Tanga, 6. Wara, 7. Rajang, 9. Anük, 10. Jenjang, 11. Alar, 14. Ngashi, 15. Nala, 16. Mechi.

LANGTSÜNGLEN :

- 2. Anga, 3. Yabang, 4. Tarok, 5. Orak, 8. Ainer, 9. Anema, 10. Jabili, 11. Among, 12. Miim, 13. Anem.



ALOKBA KIDANG MALIDANG CANDIDATEBAI SEN TALEB KA YÜTSÜR AOBA SÜLEN PHONE ASER :

Alokba : Hai, Candidateba, kodaser sen yamai alemer. Tanübo ni kidang maliasüji aser ki tonga bener arutsürji agiteko saka yasürbo ibamai agutsüra khenyongi makitsü aser vote-a magutsütsü!

Sobangba : Hai, temba, tanübo Candidatebai han (money) lema aruji, jungjunga merenshir magizüki yokogoji.

Alokba : Odang liangma. Ni kidang maliasü dangashi, jungjunga merenshir aser sayutsüngir yokla. Phone nung dang raraogoji.

Sobangba : Oh! Alokba, haka han bo agiogoto na ji? Lilir : WhatsApp

Tepela Tasoba Anogo. Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiriyimim@gmail.com nung yokang mesüra Tir Yimyim bureau tem nung agüjang.

Form for Tepela Tasoba Anogo with fields for 1. Tenüng, 2. Tasoba anogo, 3. Küm, 4. Class, 5. School, 6. Talidak, 7. Salem osang.



Mongoya A/C candidate atema common platform sentong ayonga aka



25 Mongoya A/C nungi candidate S. Supongmeren Jamir (INC), Moasangba Jamir (NPF), Imkongmar (NDPP) den Majakong Ward yimden külemi tangokba noksa nung angur. Mokokchung, 15th Feb 2023

Mokokchung, 15th Feb (TYO): Mokokchung Town nung aliba Majakong Ward Yimden-i ayongzüka 25 Mongoya Assembly Constituency nung 14 buba Nagaland Legislative Assembly election nung tokteptsüpur nem pei nükjidong lemsadaksüba den repsema külem sangdong agütsüba sentong ka Majakong Ward Community Hall nung kaogo.

Iba sentong nung Naga People's Front (NPF) candidate - Moasangba Jamir; Indian National Congress (INC) candidate - S. Supongmeren Jamir Ex. MLA aser Nationalist Democratic Progressive Party

(NDPP) candidate - Imkongmar par aseme election-i aiba kuli den ano adoker nüburtem asoshi inyaktsüba mapatong balala lemsatepa liasü.

25 Mongoya Assembly Constituency kübok ya yimsüng asem lir - Longsa, Mokokchung, Chuchuyimpang aser town ward 5 - Alongmen, Penli, Majakong, Lijaba Lijen aser Artang ward. 25 Mongoya A/C nung voters ajak agi 17502 lir.

Candidate-tem nem common platform den külem sangdong agütsüba sentong ya 2022 nung Majakong Ward lokti senden amendang lemtetba bangzüng ka lir. Asenoki election merüka agitsü

indangbo bulua jembir saka mapabo maka. Anungji, rongsen, nübu aser mapang kümzüktüsü nükjidong yur iba sentong ya taküm mezüngbuba ayongzükgoko, iba mera tila ka ajanga kenü süngiang tajung atangtsü imlar, ta Majakong Ward chairman, Marchiba Imchen-i metetdaksü.

Mokokchung Town Baptist Arogo, Assoc. Pastor, Rev. Wati-i Candidate-tem atema temoatsü meshia sarasademtsü. Iba sentong nung Chang Baptist Church Pastor den teyari meshia sarasademer tenzüker aser Sumi Baptist Church 'A' pastor den tenüngsang agüja sarasademer tembanga liasü.

BJP-i 'Empowerment Meghalaya' ta ser election manifesto sayaogo

Shillong, February 15, 2023 (Agencies): Bharatiya Janata Party (BJP) national president JP Nadda-i February 15 nü Meghalaya Assembly elections atema BJP manifesto sayatsüogo.

BJP-i Meghalaya state renloktsü aser Assam den arstsü ken o tem olemtep ajanga tembangtsü nangzükgoko.

Meghalaya nung teinyaktsü wadang jenti lir saka mapa balaka meinyak. BJP ajanga Meghalaya tashitait kümdaktsütsü ta JP Nadda-i ashi.

"Onoki Meghalaya nung 7th pay commission mapa tenzüktüsü aser teintet rogotem indang pension anasü agi teimba agütsütsü" ta paisa ashi.

Sorkari lanurtem skills renlokdaaktsütsü atema centre tem lapoktsü aser ozüng alema nakmati atuba aziokba den scientific mining tenzüktüsü, ta paisa ashi.

BJP indang election manifesto

nungsa Meghalaya sorkar mapa nung tetsür nem 33% lemsüktüsü nangzüka lir. Parnokisa takok tajung anguba kaketshir nem scooty agütsütsü aser Kindergarten nungi Post Postgraduate tashi tanur tetsür nem angati education agütsütsü ta shia lir.

February 15 nü Tripura nung civil administration officials 20,000 tashi pei lemsükba polling stations-i ogo.

February 16 nü Tripura Legislative Assembly indang polling agitsü aser iba atema parnoki lemsükba tesemi ogo.

Tanü Chief Electoral Officer (CEO) Kiran Gitte-i Umakanta School semdanga liasü. Iba tesem ya EVM machines ayuba indang strong room lir.

Central Arms Force (CAPF) company 261 dak alia state 16 nungi State Arms Police (SAP) company 139 tashi mapa

lemzüka lir. Northeast state pungu den

Uttar Pradesh, Madhya Pradesh, Punjab, Gujrat aser Maharashtra nungi State police tem mapa lemsüktsüogo.

Maneni, Tripura police aser Tripura State Rifles jawans aika election mapa den law & order ketdangtsütsü atema mapa lemsüktsüogo.

Tesüba ita 1 ser tesadang ka shi CAPF, Police aser TSR ajanga tensa aziokba aruogo ta Tripura CEO Kiran Gitte-i ashi.

"Taoba election nung ozüng alema inyakshangshio saka tan election nungbo ozüng alema inyakshangshiba 30% ajemogo. Taonung ozüng alema inyakshangshiba malitsü ta ni amanger" ta pai ashi.

"Ajungbena tenemlen lendong kar atalokra rescue operation atema air ambulance ka renema lir" ta Gitte-isa shisem.

Tripura assembly election atema ketdangtsür 20,000 shi mapa lemsüktsüogo

Agartala, February 15, 2023 (Agencies): February 15 nü Tripura nung civil administration officials 20,000 tashi pei lemsükba polling stations-i ogo.

February 16 nü Tripura Legislative Assembly indang polling agitsü aser iba atema parnoki lemsükba tesemi ogo.

Tanü Chief Electoral Officer (CEO) Kiran Gitte-i Umakanta School semdanga liasü. Iba tesem ya EVM machines ayuba indang strong room lir.

Central Arms Force (CAPF) company 261 dak alia state 16 nungi State Arms Police (SAP) company 139 tashi mapa lemsükba lir. Northeast state pungu den

Uttar Pradesh, Madhya Pradesh, Punjab, Gujrat aser Maharashtra nungi State police tem mapa lemsüktsüogo.

Maneni, Tripura police aser Tripura State Rifles jawans aika election mapa den law & order

ketdangtsütsü atema mapa lemsüktsüogo.

Tesüba ita 1 ser tesadang ka shi CAPF, Police aser TSR ajanga tensa aziokba aruogo ta Tripura CEO Kiran Gitte-i ashi.

"Taoba election nung ozüng alema inyakshangshio saka tan election nungbo ozüng alema inyakshangshiba 30% ajemogo. Taonung ozüng alema inyakshangshiba malitsü ta ni amanger" ta pai ashi.

"Ajungbena tenemlen lendong kar atalokra rescue operation atema air ambulance ka renema lir" ta Gitte-isa shisem.

Tripura Assembly elections atema Prime Minister Narendra Modi aser Union Home Minister Amit Shah nati anir tongtipang lennirtemi kanga meranga nüboyimtsüogo.

Taküm election nung Bharatiya Janata Party (BJP) - Indigenous People's Front of Tripura (IPFT) teloktepi ano

sorkar akümstü meranger. Külen, Congress-CPI(M)-i anir Left Front teloktep ajanga sorkar atsüngdoker akümstü meranger.

Maneni, Tripura Motha Party (TMP)-i autonomous council election nung takok tajung anguba sülen tan assembly election nung takok tajung angutsü imlaa tokteper.

Züngsem 60 agi akümbe Tripura assembly polling ji asüngnep 7:00 ako nungi tenzüktüsü aser nikongdang 4:00 ako tashi agitsü.

Tripura nung polling station shia nung vote enoktsür 843 asütsü ta asadangteta lir aser iba nung tetsürtemi dang ketdangtsüba polling station 97 dena lir.

Ano, person(s) (or people) with disabilities (PwDs) ajanga yariba polling station 44 lir.

Taküm election atema Model polling station 88 renemogo aser polling stations nung webcasting asütsü.

New Zealand nung Cyclone Gabrielle ajanga nisung pezü asü



Wellington, Tsüklai/February 15 (Agencies):

Cyclone Gabrielle ajanga New Zealand north tsütsü tzümetstung adoka aser anentsüh aludakja nisung pezü asü aser meyrirjang aika tesem balala nung jenoka lir.

Gabrielle yagi Deobarnü New Zealand tonga aru aser North Island anüdok tzükum leni oa jila balala raksatsü, farms, apu aser kiset shiruru pongzüker ao aser tzümetstung agi ki mubanga nüburtem kilem nungi taolen mali kumdaktsü.

Bodhbarnü iba cyclone ya tashi maitba akum aser tzüyim leni aor.

"Tepelatsü osangji yipru tamajungba ajangogo saka asenok lendong nungi mepila," ta Minister for Emergency Management Kieran McNulty-i television ajanga ashi.

"Iba teraksa ya onsara tesashi aser tesashitiba kongshia aliba tesemtem tanaben shia arutsü hopta aika agitsü."

Bodhbarnü police temi

ashiba agi nisung pezü asüba jangaogo aser item rongnung volunteer ka dena lir, shiba Hombarnü teyari meshiba nung yariteptsü ao aser anentsüh ka ajurua liasü.

Anüdok tzükim anasa Eksdale nung tanur ka tasü mang ngutet aser parnok ya tzü metzung nung taolen mali asü südi ta amanger.

Tesashitiba kongshia aliba tesemtem nung alirtem dang tzü aser chiyongtsü rizünga ayutsü ashi, kechiaser chiyongtsü agi anügapongtsü anameta nung lir. Hopta ishika tsünga yipru tesashi agi North Island nung kongshiba rongnung Gabrielle ya tanabuba jenjang nung lir aser Auckland nung tang tashi tzünglu sashia aruba aser tzümetstung nungi shia aruba mapang lir, kong nisung pezü asü.

New Zealand indang nütsung yongzüker million pongu shi aliba nungi quarter asem North Island nung alir.

Tang tashinung nisung 10,000 dak tema tesem balala

nung prokshia lir, ta ketdangstür temi asadangteta lir.

February ita tepiyong aruba dang nungi Homba aonung tzüngluru ya asem ben agi tali lir ta Hawke's Bay aser Napier region nung aliba weather station ajanga ashi. Yangji mopung ya ghonda nung kilometre 140 shi ona liasü.

Mongulbarnü iba tesem nungi nisung 300 dak tema kumzüker aser item rongnung nisung 60 taolen maka kilem ka nung liasü, ta McNulty-i ashi. Item rongnung anünga aliba nisung 20 dak tema Bodhbarnü helicopter amshia kumzüker.

Hawke's Bay nung aliba ayong tem nung tang tashi lendong lir aser yangji aliba emergency management ajanga Bodhbarnep ayong anasa nungi ainshitsü totuyuba agüja liasü. Iba asetkong nung ki 225,000 shi nung tang tashi electricity maka.

Iba yipru tesashi mechi New Zealand-i Mongulbarnü national emergency sangdong, aser yamaji sangdongba tang agi asem ben buba alitsü.

China Tir Xi Jinping-i Iran busemba sangoktsü

Beijing, Tsüklai/February 15

(Agencies): Nuclear terenlok mechi tenokdangba agüja aliba anüolen linük temi jashidaktsüsü mechi Iran-i Beijing aser Moscow den tesendaktep ulushitsü meranga Iran Tir Ebrahim Raisi-i China semdangba mapang China lenir Xi Jinping-i Tehran busemba lemsatepa liasü.

"Linük temeden wazüka ayuba aser unilateralism aser mesüshiba nungi kumzüka alitsü merangba nung China-i Iran busemer," ta China Tir Xi-i ashiba sangdong ka China sorkar meyong TV indang website nung Mongulbarnü ashi.

Raisi-i Asian nung rongsenketzung tsütsü linük tulutiba tang mezüngbuba semdangba mapang iba o ya ashi, aser pa ya küm 20 tsünga China semdang Iran tir mezüngbuba alitsü.

Alima nung tejangja lenmang ka monguteti aliba mapang Iran nuclear ken o atema pangzüng shidak yanglutsü ayongzüker aser Iran den Beijing dena lir, ta Xi-i ashi.

Iran nuclear agreement mapa kuma inyaktü asoshi jembishinü tenzüka nung China-i maneni tajunglen nungi shilem agitsü, ta Xi-i Raisi dang Beijing nung jembidang shia liasü.

2015 nuclear agreement ka ajanga Iran indang uranium enrichment sentong alener anungji linük balalai tenokdangba agientsü mechi Tehran-i nuclear nok-nü yanglutsü tasakba akumer. Yimjung kulitem asoshi nuclear energy maneni yanglur, ta Iran-i ashir.

Saka 2018 küm United States tir inyaka alisang Donald Trump-i pa molungka agi iba tezüngzüktep doktsü aser Tehran indang nuclear inyakyim azüoktsü asoshi peria meinyak ta shia tenokdangba tanaben agütsü.

Iba tezüngzüktep nungi Washington ainshiba atema China-i aitsü aser US dang iba tezüngzüktep asendenshitsü asoshi mezüngbuba mera agitsü shia arur.

September ita US-i Iran indang oil export nung shilem agiba company tem nem tenokdangba tasen agüja liasü aser item rongnung China nung amenoka aliba company pongu densema lir. Tehran-i nuclear sentong tali awaloka inyakba manen tashi Iran indang totzü aser petrochemical ayokba nung maneni tenokdangba agütsüsü, ta Washington-i ashir.

Raisi ya meina Iran nunger trade aser financial delegation tem Beijing-i aru aser Xi-i meremerena agizüka liasü.

"Alima, mapang aser puti otsütem nung tang tepenja adoka melenshia aoba mapang China aser Iran kati ka yaria aru aser kati ka asoshi bilema amalitepa aru," ta Xi-i ashi.

Russia-i Ukraine amakba mechi anüolen linük temi linük anaprong den jembia arur, aser Iran ya nuclear sentong mechi US tenokdangba tesashi kübok lir.

China ya Iran indang shishilempar tulutiba lir aser tenokdangba tesashi agüja aliba totzü alirji iba linük ya dang lir. US-i anir tenokdangba agütsüba ajanga Iran ya küm 40 dak tema nung rongsenketzung tsütsü tensa tamajungtiba nung yutsür.

Ukraine amakba mechi linük balalai senzüka yujaka Russia tembar ishika anünga aliba rongnung Iran ya ka lir.

Russia-i Ukraine nung raraba nung amshitsü atema Tehran-i armed drone tem agütsü, ta anüolen linüktemi aitsü, koba Iran-i magizüker.

Iran aser Russia tsünga tesendaktep kanga tajung lir aser yangji helicopters, fighter jets aser drones densema lir, ta Washington-i December ita aija liasü.

Moscow-i Ukraine amakba ya Beijing asoshi ken o tongtipang aser tasak ka lir, kechiaser parnok ya linük ka den-a maden amai sayur saka tongtipang tembar Russia nem yimtenren tsütsü nungita nokdaker.

Linük ana tsünga agriculture, trade, tourism, lipajen wazüka ayutsü, health, disaster relief, cobaliba aser saisapong tsütsü linük ana tsünga yariteptsü asoshi tezüngzüktep jenti agiogo, ta osang ajanga ashir.

Raisi aser Xi na tir ama September ita Uzbekistan nung Shanghai Cooperation Organisation senden alidang mezüng ajurutepa liasü. Iba organisation nung Iran ya 'full member' akumtsü asoshi merangba nung China-i yaria liasü aser yamaji züngsem kumogo.

Küm 25 tashi China-i Iran indang petroleum sector nung sen dollar billion aika indoktsü aser temelen totzü aser petrochemical product tem agütsüsü züngzükteper Iran aser China tsünga iba maparen taoba küm tenzüka liasü.

Iba tezüngzüktep ya Xi-i 2016 küm Iran semdangba mapang benoka liasü.

UN-i Ukraine nem USD billion 5.6 teyari agütsüsü ayongzüker

Geneva, Tsüklai/February 15 (Agencies):

United Nations-i Bodhbarnü ashiba agi, Ukraine nem humanitarian teyari agütsüsü aser rara nungi jena aoertem nem teyari agütsüsü atema USD billion 5.6 nungdaker.

Moscow-i Ukraine amak tenzüker küm ka shi jungogo aser Ukraine nunger million 21.8 humanitarian teyari nungdaka lir ta UN-i asatetogo.

"Rara nung anogoshia nisung asür aser nüburtem aika pei talidak ki toktsür aotsüsa akümer," ta UN humanitarian tekolakba Martin Griffiths-i ashi.

"Raraba tesem nung alirtem densema rara agi kanga mejungi kongshir alirtem nem teyari agütsüsü asoshi asenoki takokba tashi inyaktüsü," ta pai ashi.

"Ukraine nunger maneni timtem tekangshi nung lir aser parnoki linük balala teyari nungdaker," ta Griffiths-i ashi.

Teyari kanga nungdakba ajanga teyari agütsüba lokti tentet balalai ajakbo mayimjemer, saka UN-i ashiba agi, USD billion 5.6 yagi taküm kanga dang nungdaka aliba nisung million 15.3 bo tongtettsü.

Billion 5.6 nung yagi 1.7b bo Europe anütoklen linük balala nung jenoka aliba Ukraine nunger refugee nem teyari agütsüsü atema nungdaker.

Sen ya timba Poland aser Moldova dangi aotsü. Poland nung Ukraine nunger refugee 1.5 million dak tema jenoka lir aser Moldova ya Europe nung tanga linük balalai aotsü atema apusoba tesem ka kumogo.

Refugee tem rongnung tanur aser tetsür shilm 86 lir, ta UN-isa metetdaktsü.

"Europe-i refugee tem nem teyari agütsüsü atema tasü ita külemi longjem jenjang agiba sayuogo," ta UN refugee tekolakba Filippo Grandi-i ashi.

"Ajisüaka asenoki lokti balalai teyari agütsüba ya züba züba metoktsüsüla," ta pai ashi.

"Refugee tem teküzmükba kübok pei kidangi meyipa mao tashi alima kintemi parnok nem maneni teyari agütsüsü aser nongittsü nungdaka lir aser iba ya ajak dang tongtibangba südaktsüsüla," ta paisa shisem.

Rara tenzüka sülen Ukraine nung teyari agütsüba lokti tentet balalai linük ajunga nung nüburtem ayimjema inyaktüsü meranga arudar aser 2022 küm nisung million 16 shi nem teyari aser teküzmükba agütsüogo, kong Ukraine sorkari azüoka maliba tesemtem nung alirtem densema lir.

Ukraine nung rara ajanga nüburtem libaliro nung aser shishilembaba nung kongshiogo aser iba ajanga timtem tekangshi tali kumdaktsür," ta UN-i ashi.



North Korea sorkari agütsüba noksa ka nung North Korea lenir Kim Jong Un (tiyong nung abelen) den par jala arishi küm 10 shi tain Kim Ju Ae (tiyong nung achichi) na Korean People's Army tenteter küm 75 ajungba military parade ka Pyongyang kübok Kim Il Sung Square nung alidak adenba angur. North Korean sorkari prokshiba noksa nung aliba sentong nung independent journalist tem shilem magidaktsür.

Belgian Goalkeeper Arne Espeel asayaba moapu nung asü



Belgian goalkeeper dies suddenly aged 25

Tsüklai/February 15, 2023 (Agencies): Honibarnü asaya ka nung amateur team ka atema penalty ka kümzükba sülen arishi küm 25 tain Belgian goalkeeper Arne Espeel ground nung laotok.

Reuters aser Belgian media sangdong balala ajanga ashiba agi, Espeel-i penalty ya kümzük saka iba sülen ground nung laotok. Pa nem teyari agütsütsü atema defibrillator bener Emergency services tem aritepa ground telungi ai ajisüaka pa mozükidangi anir aoba sülen mapang tatsüka

dang lir süogo ta osang agütsü. Osang ajanga ashiba agi, pa nem aküm tetushi agütsütsü atema nisung 1000 dak tema adenshia liasü.

"Iba tatalokba ya ajak atema taoksatsüka. Arne ya iba club nung pa taküm tepeyong asayar aser pa ajaki meima liasü. Pa kanga tesüngjem aser teti pela dang alir aser teyari agütsütsü atema renema dang alir. Pa asüba ya par kibong aser club atema kanga takoksa tulu," ta Winkel sporting director Patrick Rotsaert-i ashi.

Winkel Sport B ya Belgium nung West Brabant kübok second provincial division nung asayar aser iba asaya nung parnok goal 2-1 agi Westrozebeke dang nungi tejakdang aliba mapang asaya tanabuba shilem nung penalty metsütsü atema maongka agüja liasü.

"Arne Espeel ajungbena asüba ajanga Winkel Sport-i mang ayimer. Arne'er kinunger aser medemertem den asükhü lemsateper," ta club sangdong ka ajanga metetdaksü.

Saudi Arabia nung Club World Cup 2023 asayatsü

Tsüklai/February 15, 2023 (Agencies): Saudi Arabia nung December ita 2023 Club World Cup ayongzükä asayatsü ta FIFA-i Mongolbarnü metetdaksüogo.

FIFA Council nung züngsemtem ajaki iba asayamung ya Saudi Arabian Football Federation nem ayongzükä asayadaksütsü atema mulunga agizükogo, kong continent trokprongla nungi champion tem aser asayamung ayongzükä asayaba linük nungi champion-i shilem agitsü.

Iba asayamung ya December 12 nungi 22 tashi

asayatsü. Iba ita tetenzüklen Asian Football Confederation-i, 2027 Asian Cup ayongzükä asayatsü atema Saudi Arabia shima liasü.

Iba linük nung taoba mapanga asayamung tulutem ayongzükä asayaogo, kong taküm Spanish Super Cup, Oleksandr Usyk aser Anthony Joshua na tsüngda 2022's world title fight aser Riyadh Grand Prix densema lir.

FIFA Council senden nungsa Club World Cup inyakyim melenshiba jangjatsüogo, kong 2025 küm nungi team 32 asayatsü

temelaba agütsüogo.

Iba asayamung nung UEFA nungi team 12, CONMEBOL nungi trok aser kasa mapang nung CONCACAF, CAF aser AFC nungi pezüzü aser OFC nungi ka aser asayamung ayongzükä asayaba linük nungi club ka ta asayatsü.

Maneni FIFA senden nung United States, Mexico aser Canada 2026 World Cup atema automatically qualify asütsü ta sangdongogo, kong World Cup ayongzükä asayatsü aser iba tetezü CONCACAF nungi parnok team asem dang akümtsü.

Bengaluru FC-i Striker Ashish Jha alizükogo



Tsüklai/February 15, 2023 (Agencies): Indian Super League (ISL) club Bengaluru FC-i Bodhbarnü sangdong ka ajanga striker Ashish Jha den tenangzüktepba ka yangluba sangdongogo. Ashish ya 2024-25 season tatembang tashi club nungi asayatsü.

Arishi küm 23 tain asayar

ya Sreenidi Deccan nungi loan nung Sporting Club Bengaluru nung arua aden aser tang pai iba club den küm anaser tesadang atema tenangzüktepba ka yangluogo.

"Ni Bengaluru FC nung adenba atema kanga pelar aser iba ya kü indang career nung kanga dang tongtibang

jenjang ka asütsü ta amanger. Nisung ajaki iba club puti otsü aser takok indang jangja lir aser kü nükjidongji meranga inyaksü aser tarutsü nung club nem takok agütsütsü asoshi bendanga agüja inyaksü," ta Jha-i tenangzüktepba tembanga yangluba sülen ashi.

Ashish, shibai pa indang professional career nung asaya 80 asayaba mapang goal 15 idaksür lir, pai Simon Grayson-i aniba team nem attacking nung teyari agütsütsü.

Indian Super League nung playoffs nung shilem agitsü atema asayaba mapang Bengaluru pur taruba asaya Kanteerava Stadium nung Mumbai City FC den asayatsü lir.

India team format ajak nung No.1 team kümogo

New Delhi, Tsüklai/February 15 (Agencies): Rohit Sharma-i aniba India team-i Nagpur nung mezüngbuba Test asaya nung Australia madak takok anguba sülen Bodhbarnü sayaba ICC Test ranking nung India team temaba jenjangi tuogo.

Innings ka aser run 132 agi asaya akokba sülen India-i temaba jenjang nung aliba Australia team atsüngtokogo. India team ya T20I nung temaba jenjang nung liasü aser taoba ita New Zealand 3-0 agi akokba sülen ODI nunga temaba jenjangi atu.

Test ranking nung India (115) team rating point pezü agi Australia (111) dang nungi timba lir aser Hokolbarnü nungi tenzükä asayatsü aliba tanabuba Test kokra parnok temaba jenjang nung jenjang yanglushitsü aser World Test Championship Final-i aitsü atema teyari agütsütsü.

India team World Test Championship Final-i aitsü

atema Border Gavaskar Trophy ya 3-1 mesüra 3-0 agi akoktsü nüngdaker.

India nunger kija asayartem rongnung off-spinner Ravichandran Ashwin-i mezüngbuba Test nung wicket ti agiba sülen pa Men's Test Bowlers Rankings nung tanabuba jenjangi tuogo. Left-arm spinner Ravindra Jadeja shiba temekok yiruba ajanga ita pongu tashi masayai liasü pa mezüngbuba asaya nung player-of-the-match liasü aser tang bowler tem rongnung jenjang 16buba nung lir.

Tanga India bowler tem rongnung Jasprit Bumrah, shiba teberem yiruba ajanga taoba küm September ita nungi masayai aruogo pa tang pongububa nung lir.

Batter tem rongnung India captain Rohit Sharma jenjang ana tejakdangi tua tang tibuba nung lir. Nagpur nung asayaba mapang pai century ka yanglua India-i takok anguba nung shilem tajung agia liasü.

WPL: RCB head coach asütsü Ben Sawyer shimogo



New Delhi, Tsüklai/February 15 (Agencies): Women's Premier League (WPL) nung Royal Challengers Bangalore-i Australia nunger Ben Sawyer head coach asütsü shimogo. Pa tang New Zealand tetsür team head coach lir.

Arishi küm 45 tain Sawyer ya Big Bash League (WBBL) nung Sydney Sixers head coach liasü aser iba den Australia tetsürtem assistant coach liasü aser tang The Hundred nung Birmingham Phoenix coach lir.

"Sawyer-i Australia den World Cup asem kokogo. Pa fast-bowling expert ka. Pai Sydney Sixers nungi BBL titles kokogo aser The Hundred nunga final tonga asayaogo," ta RCB Director of Cricket operations Mike Hesson-i ashi.

"Pa tetsür cricket asaya nung küm 20 dak tema inyaka arudar aser pai tetsürtem asaya aser asayartem kanga junga meteta lir. Auction magi tsüngda inyakyim ajak nung pai shilem tajung agiogo."

Sawyer nem Maloran Rangarajan (assistant coach and head of scouting), VR

Vanitha (scout and fielding coach) aser RX Murali (batting coach) nungeri teyari agütsütsü.

Asayamung atema team manager aser doctor ji Dr Harini asütsü aser Navnita Gautam (head athletic therapist), Huzefa Talib (strength & conditioning coach), Sabyasachi Sahoo (head physio) aser Soumyadeep Pyne (Head of Operations) nunger support staff tem asütsü.

Bodhbarnüsa RCB-i nüngtugu tennis asayar Sania Mirza, tetsür team mentor asütsü shimogo.

Iba asayamung ya Mumbai nung March 4 nungi 26 tashi asayatsü.

RCB team nung Smriti Mandhana, Australia tsür Ellyse Perry aser Megan Schutt, New Zealand captain Sophie Devine, England skipper Heather Knight aser South African all-rounder Dane Van Niekerk aser Richa Ghosh nunger densema lir. RCB mezüngbuba asaya Delhi Capitals den Brabourne Stadium nung March 5 nü asayatsü.

BILEMDANGANG

"Nü mulung agi na aitsütsüsa teli."